

Ruthy "Lady Ruth" Vrieswijk-Bergen:

Dia di tata tur dia yen di alegria

Ni maske mi edad tambe ta sigui subi, ta manera ta ayera mi tata a hiba mi dilanti na altar, na unda mi futuro esposo tawata warda mi, pa tuma mi bao su encargo den union di amor den bon y den malo. Mi tata.

Un homber cu un bon curason, un homber sabi cu semper a duna consehonan na tur su yiunan, 4 en total, y cu a haya mas yiunan acerca ora su yiunan a drenta nan enlace matrimonial cu e amor grandi di nan bida. Mi tata. Un hende cu a traha duro henter su bida, logra su metanan y sigui yuda otro. Hopi di nos sigur ta para keto un rato y reflexiona riba e ser humano cu nos ta yama papa, papie, papachi, payo of un otro dushi nomber. Nos tambe sa cu no ta tur tata ta mescos y cu pa hopi no tin dos manera nan tata. Mi tambe ta pensa, sinti y kere esey, esta, cu, manera mi tata no tin dos igual.

Mi casa tambe ta un bon tata di nos dos yiu homber nan cu ya tur dos ta un bon tata nan mes di nan yiunan. Nos tambe sa, cu tin hende homber cu a traha yiu y of yiunan y no ta den e mesun cas pa ta un bon tata pa nan. Tin padrastronan cu ta haci malo y of huy pa nan responsabilidad mientras tin ainda bon hende homber cu ta bira un di dos tata pa e yiu y of yiunan aki, cu nan amor sincero y honesto pa e mama di e yiu of yiunan aki. Pakico no, nos tur merece mas chens, mas oportunidad den nos bida cu ta asina fragil tin biaha, ora nos sufri un kebrante di salud y realisa cu bida ta mas dushi y mas miho ora nos tin nos bon salud, ora nos por cana, baila, come, hari, etc.

Nos tur tin parti di amor di Dios den nos, ora nos fe ta muestra den nos bon comunicacion y bon ehempel. Nos sa tambe, cu tin cu ta arepentí di a bay fout of di a maltrata e Sra. esposa, y cu despues kier bolbe bek cas cerca nan famia, y ta keda na e Sra. Mama e ora pa dicidi si e por confia e tata di su yiunan atrobe of no y ora e dolor ta demasiado grandi, causando cu e separacion ta keda realisa. Ta tata no ta un joke, mescos cu ta Mama, ta un posicion di suma respon-



sabilidad y curashi pa sigui enfrenta bida hunto manera un famia.

Tin hopi sorto di famianan awendia, y hopi sorto di manera di educa un yiu riba un bon caminda. Lady Ruth

ta masha pero masha gradicido cu e tin rond di dje, su kerido tata cu ta asina bendiciona pa Tata Dios, pa e simpel motibo cu nos tin su persona ainda meymey di nos y gosando di un bon



salud cu nos tin cu sigui cuida, pasobra nos sa tambe, cu na edad halto di 80 plus tin "kwaaltjes" aki aya de bes en cuando. Pero nos ta sigui proclama den nos fe y positivismo cu tur cos ta bon y cu tur cos lo sigui bon, segun e voluntad di Dios.

Nos tambe ta spera cu tur hende homber cu ta tata, asumi nan responsabilidad di cuida, mantene, sostene, respeta, apoya y educa nan yiunan lo miho posibel pa agrada Dios su regalo precioso na nan, pasobra un hende homber por traha yiu pero esey no ke men cu e ta un bon tata si e bandona su famia y su responsabilidad. Nos sa tambe cu sa tin hende muhenan exigente y mandon cu por core cu nan casa for di cas, mientras otronan ta cuida, mima y malcria nan

casa y somete na nan como e cabes di cas. Awendia tin hopi mas balans, ta tuma decisionnan hunto etc. Nos por sigui type oranan largo di e tema aki, pero nos ta clausura e relato cu nos miho deseonan pa e tatanan sea bon tata pa nan yiunan, pasobra, locual bo sembra bo ta cosecha. Amor y pordon ta algun di e bon yabinan na exito di ser un bon mayor. Pero, ora e amor a marchita y seca, por keda den bon comunicacion di adulto cu otro na bienestar di boso yiunan. Esey Lady Ruth ta kere por ta e miho regalo pa dia di tata, ora tin paz y bon comunicacion. Bendiciona ta e tatanan cu tin amor berdadero y respet pa nan yiu of yiunan. Bendiciona ta e yiunan cu tin amor y respet pa nan tata. Bendiciona ta e mulhe bunita

cu yama mama cu no ta stroba e relacion entre tata y yiu of yiunan pero ta papia cos bon di e homber cu ta tata di su yiu of yiunan, ni maske e tata ey tin otro mulhe den su bida y no ta den cas mas cu su prome famia. Feliz dia di tata cu bendicion di Tata Dios.

Y si abo tambe tin bo tata ainda na bida, bishite, hibe keiro, combersa cun'e, stime.....y bise cuanto bo ta stime.....awor.....na bida !!!!Dune atencion di curason cu bendicion di Dios. Papa, Papa su yiu mulhe ta publica cos atrobe den corant, pasobra e no tin berguensa di laga henter mundo sa cuanto e ta stima su tata, respeta y aprecia su tata pa semper !Danki pa ta nos genius Dad !!!!Danki pa ta nos tata heroe. Danki pa stima nos, manera nos ta !